

KBC THUSO

JANUARY TO MARCH
TOLBOL/DULTE/LHANAO 2022

Regd. No. 19134/88
<https://www.kbc.org.in/NAI/220/99>
No-G4/Regd. Magazine/
KBCThuso/MNP-81



KIGONJOHNA PHAT MACHAL JOHGON KIPUMKHAT NA

April Events

Palm Sunday - 10
Good Friday - 15
Easter Sunday 17

*"Kapa theng eini pumkhat ih bang a amaho jong pumkhat
ahitheina ding un, Nangman amahohi hong in"*

John 17:11



KBC 69th General Assembly mun a kikhutsuina leh kitepna ana nei thah mi 28 in ananeijun ahi.



**Ordination ana kibol
Pastor teni**
1. Rev. Thangtinlai Haokip,
KBC Pastor
2. Rev. Thangminlen Haokip,
Asst. Pastor,
Kuki Worship Service
- Bangalore

**69th KBC
General Assembly sung a
KBC Central Choir ho lasahna**



**64th KBC Foundation Day loupi tah in
KBC Head Office mun ah ana ki mang in ahi**

CONTENTS

THUMAKAI HO

KUM KIPAT LE KUKITE/ <i>Editorial</i>	1
"HUNG UVIN KIHOUTOH UHITE"/ <i>Dr. M. Thongkhosei Haokip</i>	3
PATHEN MI HEPINA/ <i>Rev. Onkho Haokip</i>	8
"Keima ka umnai Neisollin"/	10
Biblical Stewardship/	12
MEN DEPARTMENT COLUMN	20
WOMEN COLUMN	22
YOUTH DEPARTMENT COLUMN	24
MUSIC COMMITTEE COLUMN	25
Holistic Development Column	26
LITERATURE & PUBLICATION	27
KBC GENERAL ASSEMBLY '22 REPORT/ <i>Rev. Onkho Haokip</i>	29
OFFICE DIARY	31
GAMBIH THUSO LAHKHOM	33
Kuki Christian lah a AMASAPENHO	39

EDITORIAL BOARD

Chairman	: Rev. Tonglet Haokip, President KBC
Editor	: Dr. M. Thongkhosei Haokip, General Secretary
Joint Editor	: Rev. Lunkhosei Tuboi
Contributing Editors:	1. Rev. Thongkholun Touthang 2. Rev. Lamkeng Lhouvum 3. Rev. Tongmang Haokip 4. Ms. Tingneihing Kipgen 5. Rev. Lunkhosei Tuboi 6. Rev. T. Thangkhosei Haokip
Design & Layout	- Hemkholen Haokip
Circular Manager	- Ms. Vahboi Baite
Recorder	Ms. Vahnunnem Haokip

THUSO LAHMAN

Church/Organisation/Department : Rs. 300/-
Individual : Rs. 200/- (Post a Rs. 250/-)
Indian Overseas Bank, Imphal Branch
A/C No. 073201000000350 IFSC No. IOBA0000732
The General Secretary,
Kuki Baptist Convention,
Opp. D.M. College, Imphal 795001, Manipur
email: kbcindia@rediffmail.com

Advertisement bolnom hon Mobile No 70895979446
Circulation to kisai lam Mobile No. 9862107393 bolding



KUM KIPAT LE KUKITE

EDITORIAL

“Mitlhi pum puma muchi tuten kipah thanomin aga kilou hen. Akap pum puma muchi tuding poa vaikon chu, achangpal kipoh in kipah thanomin inlam hinjon hen!” Psalms 126: 5,6.

“Chuti ahijeh chun sopiteho, Pakai hung masang sen lung dehat jingun. Veuvin louhou mikhun aleiset ga lutah chu anghah jing jin, gotwi lha masa le gotwi lha nunung amu kahsen alung dehat jin ahi.” James 5:7.

Amasatah in muntina um Kuki Christian chate jouse ahideh a KBC member ho jouse chung a i Pakaiyu Jesu Christa minin salaam kahinpe cheh uve. Tukah hi boina neo neo aumjallin thuso jong aphot cha’n ahung kilhunsah thei tapon ahileh dangchah tah a ngahho henga kiphatlamna thu kahin seiye. Issue masa chun Election le Kukite thudola inakihou limun ahi. Tuchung issue ah hin Kumkipat le Kukite thudolah kihou limute.

KBC General Assembly ahung kichai tan, abanin India sunga state 5 vel Manipur jaaona a kilhenna General Election jong February 28 le March 5 in ana umin, ni 5 jou tichu nisim 10 nin result akiphong ngal tan, Christian ho leh houbung hon deibeh hih jong leh BJP absolute majority ahitan ahi. Vannoi leiset pumpiah Russia ten Ukraine chung a gal abolnau hapta 3 alhing tan, hinkho tampi leh nei-le-nga tampi asuse tauvin, vannoi kiloikhomna hon manchah leh thal in guhthima kitho-pina apejingun ahi.

March lha hi KBC te dingin jong poimo tah ahi, Mission week/ Missinary Sunday, KBC Day of Prayer chuleh KBC Workers

Day kitiho ongman louvin kimat chet in aum uve. Loulhou mite dingin jong kipatna phat ahung hi keo hilouva panmun dang danga kisahlalna nei jousehi kiboï cheh danin akilange. Hiche chung chonin, thinglhanga mi ijat ham khat a dinga pahcha lei lama kisahboina jeh in thildang ima akibol thei tapon, houbung lama thilguon ho jong aop ding kimu lou leuva mi kisaboï ahitai. Ahin, chutobanga iboina nau le ikisahboipi houhi phatah a inung vet teng leh khonunga thilpha ahinsuo doh thei hinam tihi lungdon umtah ahung hitai. Natoh atamjo pihi ulsa lonna le mitlhi lonna chu ahinai. Ahin, tekahna a minei/minga guhchat jong bailou beh ding, hahsa tah leh, ulsa lonna le mitlhi lonna hitei ding ahi. Chukit leh, numei dinga tahsa joh jong chu bailou hel ding ahi, ajeh chu miho kihouna, noisena, kidahna, chuleh housetna jong kichang ding ahi.

Chutobang chun juoh ho leh khamna thei thil poho jong natoh bai aumpon, ulsa leh mitlhi lonna ngen chu ahiuve. Tulaiya Kuki ten haona ding lampi baipena ihet le ihabol penu chu Kani leilho chu ahin, mol-le-lhang jouse haosatna Pathen anga ikun jou tauve. Hichehohi eima keo hilouva midang kana le thina asosah thei ahiuve. Lamdang khat a sei ding chun, "Pathen, nangin neivah joupoi, kikhindoh mang jelin, keima le keima kivah nage" tia ichil kiset khuma imit kikeh den tobang hipontem? Hichehin Pakaiya kingaina le ngahat kiti apang tapoi.

Chunga itahlanu Bible thucheng imu u lhilonna leh ulsa lonna vang chu jathei natohna, tekahna a loulho-thingpoh, government leh society in jong asea gellou natohna, police ho kichat umna lou tiho natoh kiseina chu hiteiyinte. Hitobang ho chu alhangpia negative effect umbehseh lou, chuti tah sanga aphalama eima kivahna le midang dinga jong phatchom sahna thei aso ahi. Pakai ngah in tin eikisei peh uve (Pss.27:14; 2 Pet.3:9). Tuhi eihoa dinga khah phat ahitan, thilpha bolna dinga phat phatah ahiye. Pathen leh mihem lungdei kisah boina ineiyu hinam ti gelpuma taona toh thoa pan lapan kit tau hite. Hichena ding chun amitakip in asemphatna dingin mopohna inei uve. Lungluttah a simho jouse chungu Pathen vangboh chang cheh tauhen.





"HUNG UVIN KIHOUTOH UHITE"

Matthew 2: 3, 19, 20; 1 Samuel 17:4ff (50)

Dr. M. Thongkhosei Haokip
General, Secretary

SERMON/ARTICLE

Thumakai

Kuki Baptist Convention in akikhel theilou thupi khat kinei jong leh akum kum tobangin thupi jong ineiyun ahi. Tukum 2022 thupi dingin "Hungun kihoutoh u hite" (Isaiah 1:18) kiti thupi ichepi diuvin ahung kiguong tan ahi.

Kum thupi hohi ipia phachom em? 2018-19 sunga "Nalampi hou le nachondanhou kisemphat un" chuleh 2020-21 sungin "Pilhinna masuon ute" ti anahiye. Tunichana ithupi houhin ichana hubung holeh mimal hinkhoa aphachoma kikhelna ahin pohlut em ti kikidongleh ipi'n idonbut diuvem? Apat chom louva ahileh sum leusah leh kiseimo kiholbep ihi diu ham?

Hiche toh kilhonna tukuma dinga kihoutona thudol sermon amasapen pedin kahin deilhenin ahi. Kihoutona thudola sei ding le jildoh ding tampi umjong le tunilhah hin alhangpi or athumakai ho bou ana sei tadiu hite. Vannoi mihe-ma cheng jouse lah a kihoutona ngaichat ahi. Nam le nam, gam le gam, insung le houbung jeng jong kihoutona ngaiyah ahi. Kihouto lou jeh in gal le tol, kinah-kibou, kithangset/ki-engset, ahilouleh aphilou tampi apot theyyin ahi. Ipi jeh a hiche thu sunpa hin aseiya, koi le koi kihoutona ngaiya, tulaiya eihon ipia chule iti iphat-chompi thei diu tam ti sermon chomcha'n itahlan nomin ahi. Bible chang ana simdoh u hite: Isaiah 1: 1-5,18.

1 Amoz chapa Isaiah-in Juda lengho Uziah, Jotham, Ahaz leh Hezekiah phatlaiya Judah le Jerusalem chungchang gaova thil amuho: Kiphin jinga um Judahte hilchahna

2 Vanho ngaiyun! Leiset nin phaten ngaiyun! Pakaiyin ase chu hiche hi ahi: "Kahin vah khang leh kahin seiletsah chaten kachungah nachonseu vin neidou tauve.

3 Bongchal jengin jong apupa akihetnin, chule Sanganin jong apu'n an aphen kong akihet in, ahinlah kamiten vang amaho kahin vah-khang dan ahepha pouvin, Israelin apupa akihet tapoi.

5 Ipi dinga gimbolna ding nakikou bebeu hitam? Itih chan gei neidou nahlai diu ham? 18 Pakaiyin hiti hin aseiy, "Hung uvin kihoutoh u hite. Nachonsetna chu thisan bangin

san jongleh buhbang banga kabansah ding, sandup jeju jongleh kelngoi mul jolsel tobanga kajol-sah ding ahi."

Thulhunluia themgaoho thusei hon akhang akhanga Pathen mite hinkho atohkhahtan aki-mutheiyee. Bible hi Pathen thuing mong ahina aphochene. Chuche khanga mite toh ikibahnau phabep jong um maithei ahi. Pathen miten hiche chonset holeh boina atohou chu thakhat ahijie. Isaiah themgao leh athupoh chu veu hite.

Isaiah Khanglai Lekhabu

Isaiah lekhabu hi kumjabi 8 (tichu 742 BCE) laiya Israelte themgaopa mina um anahiye. Hebrew pauva Yəša'yahū, kiti chun Pathen chu Huhhingah ahiye" God is Salvation" tina ahi. Amahin Judea leng 4 lallaiya — Uzziah, Jotham, Ahaz, and Hezekiah (1:1) anagao ahi. Kum 55-60 tobang hiche gamsunga anagao ahiye. Athidan kicheh tah chu aumpon, hijong leh thusim hoa kona kimudanin leng gilou Manasseh in atha masanga nasatah a anasuh gentheiyin akiseiye.

Isaiah lekhabuhi tulai Christian eihon iha minphah loipen khat u ahin, Juda te dinga jong themgao pipena asimu ahi. Christmas lai leh Isaiah 7:14, "Nungah khat gaiyin tin chapa khat ahinding ahi, ama chu amin Immanuel kiti ding ahi."Chuleh, "Eiho dingin naosen khat apengin chapa khat eikipeuve."(Is.9:6). Good Friday lam leh "Ama chu eiho

suhkhel chengse jeh in akimavon, Eiho themmo chengse jallin ama akisugep tai."(Is.53:5). Ahilouleh Pakai ahinkho le kinbolna thudola, "Pakai lhagao chu kachunga aume, lje inem itile bolgentheiya umte henga kipana thupha hillhang dinga keima thao einu ahitai." (Is.61:1). Ithau achol tenga ahileh "Amavang Pakai ngah jing ho chu athau semthah unin tin, Muvanlai bangin alhan leng touvin tin, thachol louva lhaitou diu, lhadah louhela kijot ding ahieuve" (Is. 40:30,31)

Jehovah in Angohnau: Hiche sermon masa ah hin amite dounan thu aseiyee. Christa pen masang kum 700 vella amite milim hou na leh akiphinnau ajeh agol lhae. "Ohe themmona dimsette chonse nam mite, gitlouna thilbol chilhah ho; themmona dimset mite, hiche mite hin a-Pakaiyu adalha tauvin, Israel Mithengpa chu donselouvin akoiyun ajamsan tauve." Isaiah chun Judah mite akimaitopin, anamu chu Sodom leh Gomorrah toh atekah un ahi. v. 9-10 "Eiho Sodom toh ibah jenguva Gomorrah toh ibah jeng diu ahi".

B. Ama ahounanau Asanthei lou:

Ama ahounau Pathen chu alung lhaipoi. Hiche mun chu amahon Pathen aumpinau muna agelu ahi. Isa 1:11-15 -11 Pakaiyin aseiyee: "Naki lhainau jouseu hi kaipi phatchomna umdinga nagellu ham? Keiman kelngoi chal pumgo thilto le gancha kivah thaotah tah jong kaneiyee. Keiman bongchal tampi thisan leh kelngoi thisan chule kelcha thisan hijong leh kakipa pipoi. 12 Keima eiho dinga nahung tengu leh koiam



nakithoinau puma ka-inpi chonthang dinga nakouvuvu? 13 Pannabei thilto ho chu hinpolut tahih un, nagim namtuiyu jong keima dinga thet-umtah ahi. 15 Vanlam sanga nakhut u natundoh uva natao tengu jong leh kahung vet nuva nataonau kangai lhah pehlou ding ahi. Ajehchu kho helouho thisan nakhut nuvah adimsetne.

C. Ipi jeh Ama ahounau chubang loma ajahda ahidem? Isaiah in ahilchenna ah, mipihon Pathen ahoulaiyun jong gitlouna dimset in hinkho amang uve ati.

Hitia achonsetnau phonga ngaid-am athumlouvu chu Pathen dinga thohjou hoi hilou ahi.

Akhut uva thisan dup jeng mat ho amu ahi. Eiho jong Pathen ihounauva Pathen dinga thet umtah kihithe i ahiye. John in "Koi hileh asopi hoa chu tolthat ahi" ati.

Isaiah chun Israel lamkaiho kiloset jeh a sumguh aneh u, ahuding umlou meithai-chagaho asuhgenthei jing hou aseiyin ahi. Hitobang chonset chu kilhaina gantha hon asuthheng jou ding hinam ti ahi.

Tulaiya Kukite Chonsetna anav-eu hite:

Eihon Pathen chu iinsungu le kichenna thenga konin inodoh tauve. Ipi pia hoiya kona inodoh u ham? Danthenga kichen sanga kijaam tho pung, Kida (Divorce) pung jingta, Guhthima kijonpi na-ocha kisumang (Infanticide) tamta, Insung Maicham semtup lou jallin chate hilloubo soh gam ta, thing-noimi pung jingta, chuleh adang

dang ahiuve. Insung nom chu Van gam naipen ahi, insung nomlou chu damun kipatna ahi.

Eihon Pathen chu Jilna/Tohna mun hoa konin inodoh tauve. Lekhasimna a copy/note bol/copyright/plagiarism, Natohna mun hoa kitah louna dimta, Houna ding abailam holna jeh a gamsung le mihemho kithat, Meghalaya sunga eimi themkhat drug joh/kivei jeh a Manipur mi le Kuki ho hotel la a gena jong muthei talou, college/ university/natohna jong muthei talou, Eimaho gamsung (Manipur) a khamna thei heroine No.4/ Kani/ Ganja kiman jing koiho hiuvem? Kuki ho pang teiyu, Politician ho la miho jen dinga kigot sanga ama inchen le akinaipiho semna bouva na tongtau. MP/MLA/MDC ineilou ipi um em, aga hetthei ipi ham? Tunia nang le kei chondanin inamsungu phatthei abohthei ahiloule gaosapna amusah thei ahi ajeh chu Achan chonset jeh in ama le ainsungm jouse amanthah lo tauve.

Eihon Pathen chu Ama ihouna a konin inodoh tauve. Pathen chu thutah le lhagaova ihou diu ahin koiham ajuia? Houbung lah jong phung politics umgamta, Pathen loupina ding sanga eima min kismna ding le kivah/kihinso na ding kihol gamta, Hou lamkaiho la thulah thei dinga kium gam talou, kitomona le kisei ngailouna kidim, KCLF akibolle KCC, CBCA, TBA, etc. jaonom talouvu amaho reason jeh, Pathen thupeh phatah a init uvem? Soma khat ipeh jingu hinam? Chaga-genthei-Meithai te khohsahna ineiyu hinam? Pakai

lhachaho hahsatna ihetpeh u hinam?

Eihon Pathen chu lhangpi nuna konin inodoh tauve. Ikut bolu Pathen min ipat u, ahia lah eimaho ngaichat suh bulhitna imanu – akichai teng, judonna bottle dim, numei/pasal ho underwear/bra thang jeng jung, Pao le haam a kibungkhenna kihol jing, phung-le-chang thua election kitet, Nam min le phung minhoa eima inchenna leh kivahna a kinei, Election teng mipi lung kihol louva sum thaneina leh thingnoi ho kithopina hunama kai ding kigo

Hicheho jouse iseinauva mijouse ichonseuve koima apha aumpoi tina ahipoi. Changval hihen kiloi-khomna chuleh houbung aphatah umjong leh alhangpia kisei, koima got tum neilouva kisei ahijoi. Hijongleh, Pathen lung tona ding ima iboldoh tapouve, sopiteho. Pathen gaosap chang dinga kilom mong mong ihiuve. I Pathenu chu Pakai hikha talouva ju le sa, eima tumpoh, iphung-ichang, sum-le-pai chule nei-le-gou ho chu hita lou ham?

Pakai tin neikou uve (You Call Me Lord)

Pipu (Master) neitiuvin ahin kathu nangai deh pouve,

Vah neitiuvin ahin neimuthei pouve, Lampi neitiuvin ahin nalamlha pouve, Hinna (Life) neitiuvin ahin neingaicha pouve,

Aching neitiuve ahin nei jui pouve, Ahou neitiuvin ahin nathum pouve, Tonsot neitiuvin ahin neihol pouve, Hepi neitiuvin ahin nei tahsan pouve, Apha neitiuvin ahin neijen pouve, Thanei neitiuvin ahin jana neipe pouve,

Adih neitiuvin ahin nei ging pouve, Themmo kachansah a nahileh neingoh hih in.

(Inscription inside the Lübeck Cathedral, Germany).

ACHUTI LE IPI ITI DIU HITAM?

Jehovah's Remedy: Isa 1:16-17 Nangho kisel ngim uvin lang chule kisu thengun! Nachonsetnau chu kamit mun paimangun, nachonsetnau lampi chu dalhauvin. "Nangho kisel ngim uvin lang chule kisu thengun!" – Eph 4:31-32 – Eph 5:2-5

Thilphabol dan kithemchuh un: Chang 17 na a thil li bolding kichuh din eiseipeh uve:-

Thilphabol dan kithemchuh un, Thudih chu holun.

Bolgentheina thohho chu panpiuvin,

Naochaga ho chu thu adih-in tanpeh-uvun lang, vengphau vin. Meithaiho chu thildih jeng seipehun." Col. 3:8-10

"Hunguvin Kihoutoh u hite" Isa 1:18-20

Sappauva simhon ahet diu chu "Come now" kitihiin tuhin hungun" tina ahi. Eiho pauva akiledohna a anapanglou kha ahi. Tuhin kitihiin phat bih aneieye tihi ahi. "Ven tuhi lahphat tah ahin, ven tuhi huhhing phat tah ahi" (2 Cor.6:2). Tulai nikho aphot tah loujeh hin phat kijen pet chahi kichoh un (Eph.5:16). Phat kipe sunga hung ding hi eikikou nau ahi. Tekahnan, KBC houbung hon tukum thupia ineiyu ahi kihou tona dinga tukuma hungkhom a gelkhom ding atina hinte.



'Kihoutoh u hite' kitihin gelkhomu hite tina ahi. Kihoutona hi achunglam (vertical) le aphei lam (horizontal) umtheiyinte. Achung lam hi Pathen toh kihoutohna ding kiseina ahi. Pathen toh kihouto theina dinga ichonsetnau thisan banga sandup hijong leh ikisih uva ngaidam ithum uleh Aman eingaidam uva, eisil theng uva buh-bang eisosah theiyu ahin, achuti louleh kihoutona umthei lou ding ahi.

Apheilama kihoutona hi Mihem toh kihoutohna dinga kichamtona ding kiseina ahi. Mihem khat le khat akina-nasa/kikhen tasa chu iti kihou thei kit ding ham? Hichena dingin khat leh khat dinmun kibanga kigelna (equality of all persons), kineosahna (humility) kijatona (mutual respect), kihetthem tona (understanding) chuleh kisei ngaina angaiye.

Hiche toh kilhonin, KBC khantouna leh machaal na dingin kihoutoh a lungkhat thakhat a dinkhom/tohkhom angaiye. Thakhat a dinkhom-na dinga kineosahna lungput nei ding, kisei ngaito, kilung hetto, kijatona angaiye. Pathen toh kihoutohna dinga lung heina leh kisihna nei angai bangin, eiho jong koikoi yin ilung ihei cheh uva, kineosah tah a khat leh khat kingaidam to ding angaiye. Hichun kipumkhat-na ahin pohlut a, kipumkhat chun dinkhomna ahin lhut ding ahi. Thuchih khat in, "Pumkhat ihiuleh

idinkhom ding, ikikhen jah u leh ikhehsuh diu ahi" (United we stand, divided we fall) atikhu eiho dinga jong dihtah ahi.

Kipumkhat dinghi Pakai lungdei ahin, eiho KBC thupi jong ahi. Thusim khat anaseiyu hite. Mipa khat athikonin achate akoukhomin mol kang khat2 apeuvin, 'Heh bongin'atileh baitah in ahehbong uvin, mol kang ho chu alakhomin hebohsah din thu apen koiman ahehbong jou poi.

Achainan, kihouto loujeh a insung khat a thilsoh thusim ana ngaiyu hite. Nupa khat hi akinah lhon jeh in ni phabep akihou lhon tapon, polama ho hettheiya umdan hintin, mikhat hi ain lhonna achen ni ijat ham achengin, adudu anen, adeidei akilah in akivamang tai. Amani ahung kihou thei nunga akidoh lhon leh ahejo aum lhon tapon, akingohto lhon vangin aphachom tapoi.

Khaiye, tuhin ihoubung diu leh i-convention machaalna ding le khantouna dingin lung gelkhom taute. Eihon igelkhom louvu leh kon eigel peh diu ham? Tu ahilou leh itih a igelkhom diu ham? Hiche lai mun ahilou leh hoilai muna igelkhom diu ham? Lungluttah a ngaiho jouse lungsunga Pathen vangboh changcheh taken lang chuleh i Conventionu Pathenin vangboh jom jing taken, Amen.



PATHEN MI HEPINA

Lamentation 3:22-23

*Rev. Onkho Haokip
Development Director*

SERMON/ARTICLE

Muntheng pen

Vannoiya nam theng pen a kisei chu Israel ahi. Israel gama khopi thengpen chu Jerusalem. Jerusalem a muntheng pen chu Houin mol ahi. Houin mol a mun thengpen chu Houbuh ahi. Houbuh sunga muntheng pen chu muntheng chungnung ahi.

Muntheng chungnung muna muntheng pen chu hepi touna ahi. Hapi touna mun achu maicham kitem a hichu Pathen lunglhaina hiji ahi. Pathen lungsung theng chungnung sunga kimu chu Hepina, Lungsetna le Ngailutna ahi.

Christa vanga them ichannau Pathen hepina ichan jeh u ahin, ama chu maichama kitoh jeng ahi. Ama chonphat chu eiho lah a hung kiphongdoh ahin, eiho chonset kiphongdoh lou ahitai. Ama chu thengtah ahin ahinlah mihemte in kinailut thei ahi. Ama chu michonsete in atokkhah thei u ahin ahin ama chonse thei lou ahi. Mihemte in ama athamkhah teng uleh mihemte gitlouna chun ama asuboh pouvin, amavang Ama chonphatna le mi suhdamnaho chu mihemte ana chang jiuvin ahi. Hepina hi chonset sanga lenjo ahi. Chonset hi Revival asuhtang ahapon, Revival joh hin chonset asuhtang thei ahi.

Christa chonphat le mihemte chonset kilhehto

2 corinthians 5:21 - Chonset heloupa chu Pathen in eiho khel a chonse asi-ma, eiho chonphatna neilouho hi Ama achu Pathen chonphatna ichansah u ahi. Tunia hi eiho hi Pathen chonphatna kibuhlhahna chu ihitauvin ahi.

Jesu chonset bolloupa nang chonset akipeh banga nang chonphat bol loupa jong hi Pathen chonphat na kipe ahitai, hiche hi Pathen hepina jal ahi. Min thilpeh (gift) na hinpeh tengleh nang in hiche thilpeh chu aman na le peh lou ahi. Aman na le peh leh apeho dinga thil nom ahapon chule thilpeh kiti talou ding ahi. Na bol theipen le kipana pen chu ka kipah e tiding bou ahi.

Israel thempu, kelngoinou le michonsepa

Israel thempu angsung'a michonse khat in Kelngoi ahin kai tengleh thempu



chun mi chonsepa chu ahoi ahoilou le aset asetlou akholpon, kelngoi joh chu nolnabei hinam tin akhol in ahi. Kelngoi chu nolnabei ahileh michonsepa in akhut kelngoi chungangap ding thempu pa in kelngoi atha ding ahi. Hichea chu maicham kisem ding, michonsepa chu chonphaa kisim a ama inlama kiledoh ji ahitai. Kelngoinou chu athi dinga lom ahipon chule michonsepa chu ahing dinga kilom ahipoi, ahin ana soh in ahi. Hiche hi thisan'a kijih hepina thusim chungnungpen ahi. Leiset mihemte jong Pathen in eiho chonset akhol ahitapon, Van kelngoinou Jesu joh akhol ahin, ama nolnabei maicham ahitoh lhon'a hepina jala them chang ihui ahitai. Tahsanna dihlouvin hinkho dih apehdoh theilou ding ahi.

Matthew 6:33 a amasan Ama gam le a chonphatna hol masauvin atihi Christa a ichonphatnau ahin, eiho chonphatna hol ding ihipouve. Christa in tahsan cha eisou ahipon chonpha eisou ahi. Na umchan le chondan hoi jeh a chonpha na hipon, na chonphat jeh a umchanpha nanei ding joh ahi.

Chonphatna hi chamkimsela kipan ahi

Christiante hi ol ol a lam ijot uva ihung chonphat jep jep uva achaina le chamkimsel a ihung chonphat dinggu ahipon, Hepi touna mun'a Jesu chonphat ichan jeh uva ikipatnauva pat a chamkimsel a chonpha ihuvin, hiche chonphatna puma chu vannoi-

ya ivadod diu, lhagao lam ijot diu ahi. Jesu chu nikho masapen nia anathodoh chu hapta lhungeiya natohna ding um ahi.

Lhagaotheng, chonset, chonphat le thutanna

John 8:8-10 - Lhagaotheng in vannoi chonset (singular) thudol, chonphat thudol le thutan thudol ahung hettosah ding ahi. Chonsette chu chonpha kiso u ahin, Chonset hi khatbou aume, hichu Christa tahsanlou ahi. Thutan thudol chu Satan thu kitan ding ahin, chonphaho kiseina ahipoi. Lhagaotheng hin mihemte koma Pathen ngailutna, hepina ahung seipeh ahi (Rom. 5:5)

Christa hepina akan ksiltheng ihiuve

Mihemte inetnau, ichonsetnau hi Christa in eisoptheng peh jeh uva theng ihui ahin, soptheng ding ihijeh uva kisutheng ihilou u ahi. Kisil masanga kisutheng koima kium lou ahibanga chonphat ichan masang uva chonpha koima kiumlou ahi. Tua jong na chonset pum in Christa koma chen, ama in hepina neipuma na suhtheng ding ahi. Pakai hepina chang joulou khatcha iumpouve, ibonchauva Pakai hepina chang ihicheh uvin ahi. Ihinkhou ijakai Pakai hepina ihingsetna ikalsong jing theina ding uvin tao jing utin Pathen thangvah jing uhiute. Kumlung in Pakai mi hepina in eilhonpi jing jeng tauhen.



"Keima ka umnai Neisollin"

SERMON/ARTICLE

Thumakai:

Keima kaumnai neisollin, kiti thu cheng hi Lacheng pao ahin Isaiah Themgao pa hin iti doil'a ahin sei doh thei ahidem ? Isaiah Themgao lekhabu hi Israel chaten, Pathen in phat thei aboh nao ho asuh mil nao chung'a achunguva ipi pi hung ding ham ti Themgao pa thilmu (Vision) in akipanin ahi. Amah on phat thei achan nao ho aki letsah piuvin, aki thang at piuvcin ahin, hoija kon'a hitobang phat thei na chu hung ham ti asumil taovin ahi. Hijeh chun Hiche Isaiah Bung 6:1-8 sung'a Isaiah thilmu (Vision) thil thum a umin hiche ho chu aban chan veu hite.

• Chunglam thilmu (Vertical Vision)

Amasapenin Isaiah Themgao pa hin Pathen umdan leh aloupi dan, Athen dan leh vahchoi ding'a lom ahina amun ahi. Bible in "Ama chung'a chun Seraphim te ana dinguin, khat khat in lhaving gup cheh anejuvin, alhavingin amai akhuin, alhaving ni man akengpha teni akhun, alhaving nin apan san alenguve. Chuin Seraphim khat chun Seraphim khat ma chu akouvin ajah'a

"Atheng, Atheng, Atheng kiti chu thaneipen Pakai ahin, Leiset pum-pi hi ama thaneina adimsoh e ati." 6:2-3.

Hiche mun'a hin Isaiah hin kicheh tah in Pathen loupina chu amutan ahi. Tunia ei hon jong Pathen chu itobanga'a I mutah uvem ? Pathen athen na leh aloupina kidang tah chu amutan, chugoh hilouvin van'a Seraphim ten avahchoina leh aloupina chu kicheh tah in amutan ahi. Peter lekha thot chun "Nak-oupao athen bangin nang ho jong nun le khan jousea thengun ati" (1 Peter 1:15). Pathen hi Athen na

kidang behseh jeh'a loupi a ahi.

• Eima sungil lam kimuna (Inner Vision)

Isaiah kiti min hi Pakai chu huhh-ingpu ahi(The LORD is salvation) akitin ahi. Themgao pa hin Pathen loupina kidang tah amu doh jou hin ama hina ahin kimu tan ahi. Tulaijin mi tam tah in ama hi na kimudoh louvin, midang hina bou amujiuvin ahi. Pakai gam nato na ding leh Pakai seijui kicheh tah hi-doh na ding'a eima hina kimu cheh set hi apha pen ahi. Isaiah Bung' 5 sung iven ahi leh ama koi ham ti akimu doh masangingin, midang



ho chu, "O he ada nahiue." Ti thucheng gupvei (6 times) asei doh in ahi. Midang ho chu akoh in O he ada nahiue ati ahi.

Hinlah Isaiah bung (6) sung'a ama le ama akimu doh phat in "O he ada kahitai" ijeh inem iti leh keima amang thah kahitai, ajeh chu keima mi kam theng lou kahin, mi kam theng lout e ja lah'a cheng kha kahiye, ajeh chu kamit in lengpa thanneipen Pakai chu amutai (6:5). Isaiah hin ama hi na akimu chen phat in Pakai anga nasatah in akisunem tan ahi. Ama akimu chen phat in ahina jouse aki hechen tan ahi.

Chrastian hinkhoa hinkhoa hin eima kimu chet hi Pakai anga dia kalson na ding'a thil phattah ahi. Chapa vahmang pa jong ama akimu chen phat in "Chuin ahung khah doh phat nin" kiti hi ama le ama kimu chen (Self Discovery) tina ahi. Hijeh chun ama akimu chet phat in apa a kon'a vahmang chapa chun apa ahin hol tan ahi. Sopite, tuni eiho hinkho a jong eima leh eima kimu chen ding hi thilphatah ahi. Isaiah ama leh ama akimu chen phat in abana athil mu chu ahileh sah leh lhang akimvel amutan ahi.

• Akimvel vel, sah leh lhang (Horizontal Vision) amu tan ahi.

Isaiah chun anam mite din mun, Pakaia kon'a vang mang nam mite ahin-ao chu ahin mudoh tan ahi. Mi ho chu leiset haosatna leh loupina minthan nah o anei phat un phat thei hung kon doh na leh Egypt gam asoh chan naova kon'a hinpui doh chu koi ham ti asumoil taovin ahi. Hijeh chun hiche nam mite kon'a Pathen thupha sei phong ding'a Pakai jin koiham kei ho ding'a che ding chu, koiham keiman kasol ding chu tia kholhang kisam chu aja tan ahi. Hiche laitah chun Pakai kei ka umnai neisollin tia kouna chu ana donbut ahi.

Tuni jong Christa kipana thupha hepha lou sang tamtah lah'a Missionary ho leh Evangelist, Pastor ho jengin bou adonbut ding ahipon tunia Christa thisana them chang jousen Pakai kei ma kaumnai neisollin iti diu hi ngaichat ahitai. Hiche thupha sei phong dingin Houbung mite Pakaijin ei kou jingun ahi. Tunia koiham Pakai ding'a vaikon ding? Vahchoi la sampen, " , Koi che tan tem koi che tan tem, eikoi jingui ei ho India gam'a, ka ongpoi kaongpoi ti idonbut diuven?

Thuchaina:

Hijeh chun tunia KBC Mission Sunday iman nutoh kilhonin Pakai keima ka umnai neisollin tia Pakaiya kipeh lutna thah isem diuvin Pakaiminin temna kahin neijun ahi. Mi masa Missionary hinkho gel doh u hite, Ipidia Pakai a dia vaikon hiuven ? Pathen thu in min van noi leiset pumpi nei jong leh ahin na achan leh ipi pha chom ding ham ati chu agel doh jiu ahi. Asim jouse Pathen in phat thei boh jing taken.



Biblical Stewardship

By: Rev. Th. Touthang, Finance Secreatary, KBC.

Bible dung juija nei chin kiti hi Old Testament phat laija koitobang insung apumpia mopohna le tha neina kipe ho natos hi ahi. hiche hi Adam le Eve phat sunga "Pathenin amani chu phat thei aboh lhonin, hinpha lhonin lang pung lhonin, leiset chung hung dimset lhonin, nathun nunsah lhon tan; chujongle twi khanglen'a nga ho hihen vanlai jola vachate hi leh, chule leiset chungah lhale ganhing jouse hile achunguva thunei vaihomin pang lhontan,"ati. Gen.1:28-30. Hiche hi neichin kipat na ahi. Hiche neichin lah'a hin Joseph Potiphar insung pumpi sunga neichinga apan hi neichin dihtah hidingin ging chat ahi. Ajeh chu mimasa Adam chu Pathen nganse naa kon in ana losam in kitah louna lhepllah na anachang tan ahi le mijouse chungah sapset na alhun tan ahi. Hi-chu lhagao thina le tahsa thina chan gei alhunlo tan ahi. Ahin Joseph vang chu Pathen in anganse na ahet jing jehin Potiphar Insung pumpi thanei na jouse kipe ahi vangin lhepllah in aum deh pon ahi. Gen 39. Amahi thanei najouse kipea nejouse chungah ching theitah a thulhuh na sem dinga Potiphar insung jouse kipe doh ahi tai. Neichin kiti hi insunga sum mandan seh hilouva thiljouse chungah mopohna len chu ahi joi. Adam le Joseph hinkho a mudoh thei jil doh thei chu ahile hinkho lhum keija Pakai ang sunga asun ajanna kitah tah'a kiman chah na ding pahi Pakai neichin dan dihtah chu ahi. Joseph le Mary kichen na chung changa jildoh thei kit khat neiching kitah nachu ahile Joseph na inneipi Mary hi aso kah sea nakitoh khapi louding ahi ajeh chu ama nu hi Lhagao thenga konna gai ahi ti thupeh chu achin tup jinga kitoh khah pi lou hel a um ahi. Chuleh Paul hinkhoa Neichin hi ama hinkho chule amang thai ding ho hin kho le Houbung chin tup hi ama mopoh na len pen in akilangin ahi.

A. Pathen thu dungjui neichin kiti hi ipi kiseina ham? Or ipi tinaham?

Pathen thu dungjui a Neichin kiti N.T. phat a Bible in kichien tahn hiti hin aseijin ahi, 1Cor. 6: 15; 19-20. Eima tahsa chungah jong Neiching (steward) ihi cheh uve "Natahsau chu Christa tibah ahi ti nahet louvaham? Chuti chu ahile Christa tibah ho chu ilah manguva notijoh tibah a isem dingu ham? chutiponte. " ..Natah sao hi a-in theng ahi ti nahet louvuham? Nangho nanghoa tum nahipouve; nangho man kipea kichosa nahitauve, hijeh chun natahsa chunguvah Pathen choianun" Neichin kiti thucheng hi Pathen thutoh kitoh'a tahsan chate pomdan mihemten Leiset le asung'a thil um jouse avetsui ding, aching tupding, angatup ding, avengtup ding, asem phading, akhantou sah dinga mopoh na jouse anganse ahi. Definition of stewardship stewardship is one of the most important concepts we can define. According to Merriam Webster, stewardship is "the conducting, supervising, or managing of something; especially the careful and responsible management of something entrusted to one's care"

Neichin kiti Gollui pao va natos min kiseina khat jong ahin, hichu mikhat chun midang khat thil ahilou le neile gou khat avet tup achin tup peh, ahiloule



chingthei tah'a amanchahna tina ahi. Nang jengjong hetlou kah'a minei le gou khat chung a mopohna nei nahung hi thei ahi. Achingtup, vetup a hung pang thei nahie. Chule alhangpia phatmandan, (time management) iboltheina (tal-ent) chule Treasurer neile gou hojouse hoitah'a dihtah'a vettup chin tup hichu NEICHIN (STEWARDSHIP) kiti chu ahi.

R.C. Sproul in hiti hin ana podohin ahi. Neichin kiti hi Pathen thilsem ho jouse chung a vaihomna mopohna Pathen nganse na dungjui ja vet sui ja phatah a venbit ding semphat ding tina ahi. Mopohna, venthemna, Mandan themna, athilsem sa suselouva semhoi ding Not to abuse but Beautifying bol ding ahi ati.

B. Bill Peel kitipa hin Eassay khat ajih in a title chu ahi le "Leadership Is Stewardship". Atin ahi. Ama essay hin eiho Christian te Bible dungjui'a nasatah a ikitho pi theina diu aum in ahi. Peel in aseina ahin "Stewardship" Chung changa hin danpi chena lhongpi li (4 Principles of Stewardship) tin aseijin ahi.

B. 1. The principle of Ownership (Aneipa hi na): Deut.8:18; Psa.24:1; Ezek. 18:4; Haggai. 2: 8. "Owner have right and Stewards have responsibilities."

Psalmist sunpan Van le Leiset le asunga thil'um jouse aboncha Pakaija ahin, chule asunga cheng jouse jong abon cha Pakaija ahi tin apan nin ahi. Hiche in avetsah chu ahile eiho hi anei khat cha ium pouve ti kichen tahir ahilin ahi. "The earth is the LORD's, and everthing in it, the world, and all who live in it" Psa. 24:1. Semtilbu (Genesis) kipat na ivet leh semtillin Pathenin Van le Leiset le asunga thil umjouse ahin semin chule honlei ngah ding le avengbit dingin Adam kiti mihempa chu ahin koi tan ahi. Hiche hi Stewardship Neichin kipat na abul chu ahung hi tan ahi. Pathen nei chu Mihemin ahin vettup a ahoi na khan tou na Development natoh chu ahin pat'a Manager natoh jong ahin pat namun chu ahung hi. Hijeh a hi Neichin stewardship akiti tengle Seingai na thunun na Kipehlutna Obedience le commitment jong hi mihem khat natoh na dinga Pathen deisah khat jong chu ahi ti imudoh theijun ahi.

B. 2. The principle of responsibility (A toh ding kin'a mopo hina): Matt. 25: 14-30.

Pathenin house tah le kipah taha athilsem jouse ei peh doh jeng vanguvun thil jouse hi aboncha ama hithou thou ahin, eiho amopo avengtup ding le avah khanga asem hoi ding a eikoi jui ahi joi. Aneipa Apupa chun thunei na anei ahin, Chingtup pa avengbit pa chun mopoh na jouse akilah ahi. Eiho hi Pathen Neichinga pang asohte chu ihui ahi aneipa Pathen chun eihoi loupitah le tahsan um tah aveng bit ding, avah khang ding, asemhoi dinga einganse uahi.

B. 3. The Principle of accountantbility (Tahsan thei tah a mopo hina): Steward kiti hi midang khat thil chingtup vetup le amang cha a pang aneipa hi lou, eiho nei hilou Pathen nei chinga pang ihuvin ahi. Hibanga hi eihojong Pathenin anei vetup dingle ching tup dinga einganse uahin, nikho khat tengle inatoh nao chung cheh'a pathen ang'a itoh ga cheh ipoh lut diu ahi. Chuteng le atam tupa atam atding alhom tupan alhom at ding itoh phat dungjui cheh'a toh man ikisan diu ahi. Gal. 6: 7-9; Rev. 22:12 "Veuvin keima kahung vah ding ahi; chule

athilbol achonna dungjui cheh a lethuhna kapeh ding tohman kakoma aume."

B. 4. The principle of reward (Kipaman kihopna):

Bible ref: Col. 3:23-24; Matt.25:21Col. 3:23-24; Matt. 25: 21-30. "Sohpha tahsan umtah. Nabol aphotave; nangma them khat chungah tahsan umtah nahin. Keiman nangma tamtah chungah kapansah ding nahi; nangma na Pakai kipana'ah luttan" ati.

"God Cares how you use what He gives you" Pathen-in napeh hi iti na namchah em ti hi agel khoh jing ahi. Pathenin eipeh'uhi hoi tah le phatah'a iman diu adei ahi, ajeh chu thiljouse hi amakhut soh ahin ahi.

Bible in eihil uchu ahi le Pathen khut sem jouse hi phatah a mang dingle vengbit dinga chule avaicha genthei kithopi dingle angaicha ho a dia pan la dinga eikoi juahi. (1John 3:17-18; Prov. 28:27, 1Tim.5: 8)

Neichin kiti hi aneipa peh kit tahlou ding tina ahapon anei Pa Pathen peh kit ding joh tina ahi. Ajeh chu aman nadei nangaichat jouse napeh jeh'a aneipa nahet them na dinga napeh kit ding ngai ahi. Ipu-ipa teuvn thinglhang gam lou alho tengule agam neipe kai/Changseo apeh uahi banga Pathen jong ipeh dingu hi ama dei ahi. Ipijeh a Hopsom Pathen ipeh jiu ham? Pathen peh ding lom ipeh lou tengle gucha kihi louva achom ihi jiu ahi ti Bible a akimun ahi. (Malachi 3:10). "Chuin Abrahamin Melchizedek chu thil jousea konin hopsom'a hop khat apesoh keiye."Gen. 14:20.

Matt.6:2-4;19-21. "Nget le tui-ek in asuhmang thei lou na vanna nagou khol un ati ahi". "store up your treasurer in heaven."

C. Pathen Hopsom peh aphot chomna ho: (Malachi 3: 1- 12; Proverb. 10:22-23)

1. Pathen Houin sunga neh le chah thalhing ahi.
2. Pathen hi Hopsom ipeh leh phattheina eiho dinga twi sunna kilha ding ahi. Nei le gou Damtheina Housatna Inchen nopnahung lhung ding ahi.
3. Lousoh hon soh phat thei changa aga pha hung ga ahi.
4. Anche louhing itu jouse jong dam thei ahi.
5. Hichun sum le pai ahin punsah a inchen kikeh len ahi.
6. Insunga damna le kipa na um ahi.
7. Ule nao kithopi jou thei na hung um doh ahi.

D. Hopsom ipeh loule Hamset na ahi: (Malachi 3: 1- 12; Deut.28: 15-26; Lev.26:14-46)

1. Pathen Hopsom ipeh louteng agu cha kihi lou va anei chom akihi e.
2. Pathen Hopsom ipeh louteng gaosap na kichang ding ahi.
3. Pathen Hopsom ipeh louteng leh Natna veisetna hunglhung ji ahi.
4. Pathen Hopsom ipeh louteng leh Ane mang dingle asumang ding hung lutje ahi.
5. Pathen ipeh dingdol ipeh louteng abah gam ding ahin sol je ahi.
6. Pathen Hopsom ipeh lout eng Hospital'a Court'a chule guchan aguh mang ji ahi.
7. Pathen Hopsom ipeh louteng neile gou kikhol na twi bel avong sa tabang ahi.

Eiho Lamkai jouse hi Pathen Neiching ihicheh uahi. Achunga ihin sei banguva Pathen neiching ihinauva kitahna, seingaina, phat mangthem, neile gou



chingtup ihiu hinam?KBC neile gou thupi pen hi Bible ban tah a Constitution ichena Ihonpiu Danbu ineiju hi dih tah'a chipi ding angai jin ahi.

Thuchaina/khumkhana:

1 Tim. 1:12 ***"ajehchu aman keima ginchat uma eingaitoa, alhachaa eipansah ahitai; tumasanga houtai tom kanahia, abolsea kapanan a asuse hat kanahi jeng vangin, hepina kamu ahitai ; hiti ho chu hettou lou man le tahsan lou thua kana bol ahijeh chun."*** Sopite ho Pathen neiching ihinao Adam le Paul anganse na banga nangle keijong nganse na einei'u ahi. Hijeh chun Adam anganse banga lhepna'a lhalouvin, Paul bangin kipaman san nading joh-in kitah tah'a Pakai mai-vea, KBC kivaihom na Constitution danpi Chena Ihongpi Som'a khat le Maicham 50 % Head Office'a peh ding heimil lou ding chule Pathen thu dungju'a KBC iki phu doh nikho'u 16/3/1958 chepi ding Thupi kisem doh John 17: 11 "Kapa theng eini pum khat ihi banga ama ho jong pum khat ahi thei na dingun nang man ama ho hi hongin" 1. kipumkhatna (Unity), 2. Pathen thu lhangsap (Mission) na toh chule 3. (Service) Lhacha natoh vaicha genthei hahsa kithopi nanatoh, subulhih ihuiva, avengtup, agelkhoh, asemhoi, khan-tou machalsah'a pang dingin Paul bangin Houbung sumang dinga hita louva avengtup, achingtup, avahkhong, ding le pathen lungdeija natong dinga ahung kipeh doh bangin nangle keijong Neiching Kitahpa/kitahnu Sopha tahsan um tah na Pakaipa kipana luttan ti Aw ja dingin kigong utin, pakai ja dingin itoh theichan tong pan taute, Chule eiho Lamkai na phat sungin Pathen Houbung miten Somma khat le maicham thil to ahin to ho sum le pai chung'a thutah thudih chule khantou machalna aum theina dingin pang-utin, alhun na ding a lom lhunsah cheh ding le kikhelna polut dingin kigong ute tia Pakai minna ikitem nao ahi. Pathenin KBC Houbung mithengte jouse le Lamkai mopo ibonchao vin phatthei eiboh tao hen. Amen.



Kipa Thuphon

Pakai kum 2022 kum sung hi Covid 19 jeh in Lockdown leh dammo veisetna tampi ana umin ahi. Hijeh chun mihem hina in igel leh kum'a kigong Budget ho jong kimu jou lou ding hitam tia aki um lai jin Pathen vangboh na lent ah I changuvin Budget ho jong phate chan akimu thei jin Pathen thangvah in um hen. Ahi deh in Centre Church Houbung ho atamjo hi kum'a dia kigon peh Budget kalval'a tamtah tah hin mu leh hin pe ho jouse chung'a Convention pumpi tha lhengin kipa thu sang tah in kahin phongin ahi. Kum thah lam'a jong Pathen ma puina chang jing dingin Pathen in vang eiboh jingo hen.

*Rev. Thongkholon Touthang
Secretary Finance, KBC*

MISSION & EVANGELISM BOARD (REPORT - JAN-MAR 2022)

*Rev. Lamkeng Lhouvum,
Mission Secretary*

Mission Column

KIPA THUPHON

1.KBC Mission Board Tour Programme. Nisim 12-13th February 2022

KBC Mission Board Member ho chengin KBC Gambih No. 6 Houbung ho vilna akineijin ahi. Hiche a kache niu hin, kipa umtah in Rev Jiteen leh insung mite ho, Cha leh neh thei tuitah eineh sah un, cha don khom na jong kaneijun ahi.

Chuleh Maohing Nepali Baptist Church ding Houin mun ding jong vet lhahna kaneijun ahi. Rev Jiteen leh insung mite chung a kipa thu sang tah in aki phongin chileh Insung mite din Rev Lamkeng Lhouvum Mission Secretary pu tao peh na jong aneijin ahi

2. AMRAJAN & SAIJANG MISSION FIELD VISIT — 2022

Achesa nisim 15th — 16th Feb. 2022 nin Rev. Lamkeng Lhouvum, Mission Secretary, KBC lamkainan, Mission Board member: Pu Neka Vaiphei le Pu Hegin Haokip chuleh KBC C/C MOLNOI, Deacon Board mi 8 cheng toh Imphal dalhan a Assam gam ana vai kondoh nading uvin Rev. Thangkhousei Haokip, Literature Secretary, KBC in Pathen heng'a taona ana man peh uvin ahi.

Pathen lungset jalin nisim 15th Feb. 2022 nikhon KBC Mission Board le C/C Molnoi Board of Deacon toh Imphal dalhan ana kalsongin uvin, 9:00 am vel in Mao gate damsel in ana lhung uvin ahi. Chuin nilhah 2:00 pm vel in damsel chan Amranjan Mission Centre ana lhung uvin, Missionary Thangkholun Kipgen leh insung miten Mission Board ho le Houbung lamkai ho kilom tah in ana...

3.Tripura Mission Field Atahsan thah ho Tuilut

Nisim 20/02/2022Tuni 20 Feb nin Tripura Mission Field, Emprut Cherra mun a tahsan thah mi 6 ana kibe in twilut na ana nei un ahi. Kipa vetsah nan houbung miho din jong ankong ana kitem peh e. Pathen a ikipah uve. Taona le thumna a eihin panpi jing houbung mite chung a kakipah uve. Emprut Cherra hi Pathen helou ho lah a jong missionary koimacha lut ngam lou na mun ahin Pathen in alhacha ho eimang cha un houbung khat itung doh thei tao vin tahsan mi 19 alhing tan ahi. Kikhop na din in khat rent a akilan hiche in jong hi atahsan ho toh chapang ho ikikhop le eiket tapou vin ahi. Adeh in Tripura hi gamsa gam ahi jeh in nipi hung hi le hung hahsa ten din a um tan ahi. Thinglhang kho ahi jeh in rent a din in dang jong akimu jou pon ahi. Hijeh hin natao nao ka ngai cha jing uve.

4. Tahsan thah ho jeh'a kipa thuphon.

Nisim , 21/02/2022 Kipa umtah in Rev Jiteen Mission Supervisor Gurkha Ne-



pali Mission field leh team ho kiman chah na a Moreh Hindi Baptist mun'a tahsan thah ahung um thei jalin Pathen thangvah in um hen. Mabana jong Pathen in Pakai lhacha ho mang cha jing taken

5. Mission Week & Missionary Day 1-6th March 2022 kimang kipa thu seina.

Tukum Mission Week & Missionary day hung kiman na ah, Pathen lungset in Speaker mi 110 Houbung mun chom chom'a akisollin ahi. Hi che kin'a kimang cha Pakaiya ja umtah Pakai lhacha ho Speaker a dia kal song doh ho jouse chung'a kipa thu sangtah in kahin phongin ahi. Chuleh Houbung miten jong kipah tah'a ilam to jeh un kipa thu sang tah in kahin phonge. Chuleh Missionary day nikhoa dia Vahchoila hung kisem, " Pakai keima ka um nai" ti mang cha a vahchoila kisem jong Houbung mun tampia sah doh a aum jeh in Pathen thangvah in um taken.

6. [21:00, 21/02/2022] MI TOMNGAITAH KBC No. 11

Pu Letthang Haokip MB Saichang KBC no 11 mission chairman puhin ama gambih sunga mission share hohi anadonkhom ji ahijehin gambih a houbung hole office adin ajangkhailheh jengin ahi. Hithei henlang amabanginin ibonchaovin gelkhohcheh thei leuhen mission na itohnao hi machal lheh inte Pu Letthang le agambih mite chung a kipathu kahinseije

7. 21/02/2022 SEROU MISSION FIELD.

Hiche nikho hin Mission Board min'a field visit akibollin ahi. Hiche field a um missionary Pu Lalminlun Kipgen amale ateam hohin hattahin na atohjing u akimun ahi achung a lim kilahkhompi khat hi tahsanthah ahin Pathen phasah ahile ajinu le achapa puma agangthei penna Bataize bolthei ding jong amaho akonin akijan ahi. Hijehchun Houbung miten field ineihou dingin taonan kopjing ute.

8. Nisim 21/02/2022] LONPI HOUBUNG VILNA.

Lonpi houbung hin tukum Missionary khat goiding anopnao jalin Mission board toh kihoukhomnale kinoptona akineitan ahi. Hiche Lonpi Houbung hi in 50 velbep ahiuvun ahi. Hijong leh Pakai gam'a din kitho khomna nasa tah ahin neijun KBC Mission toh Houbung kithoa Missionary khat soldin kigotna aneitaovin ahi. KBC houbung sunga amaho bang a lhagao mangthai gelkhohna nei ho phabeppi ineijeh un KBC ivangphaovin amaho jalin Pathen ithangvah uve.

9. 21:02, 21/02/2022] : MISSION SPONSORED BOL DING KIBE

KBCn Mission na itohnao hi hb akona Mission share ipehhou keuseh hilouva igamsung uva mi hongphal Pakai nato ding gelkhoh mi aum be jing thei jeh in Pathen thangvah in um hen. Hiti chun Khopijang Baptist Church (Inpipu) injong tukum'a parna hi kumkhat a Mission support money adin .30,000/ (Thirty Thousand only) peh din kitepna aneijehin achunga kipathu Mission board in akiseijin ahi. Hetthei khatchu ain neipi jong hin kum ijat ham khat sung'a hi support money kumkhat a ..20, 000 (Twenty Thousand only) jong anapeh jing ahi. Pathenin jatjan Phatthei bohjing taken.

10. 21/02/2022 MAIN SANCTUARY EPM

Elijah Prayer Mountain (EPM) Muna main sanctuary isahnao hi lolin amachal jingin ahi Pathenin pha asahle tukum sung a joteiding ti lunggel chu ahijingin jotheina ding lampi chu sumlepaija jong hung kingam ding ahijehin Houbung miten itaonao pumin panna thei lampi chomchoma pan hinladin jong tem ahi

11. 22:13, 25/02/2022 KIPA THU PHON

Manipur Baptist Convention, toh gon na noiya 43th Mission Conference chu achesa 22-25th February 2022 sunga Longmai Part II (Noney) Baptist Church RNBA Host hina a kipah thanomin ana che lhatan ahi!

Main Speaker ho chu :1. Rev Dr Kh. Khaizakham

2.Rev Losii Mao General Secretary MBC

3.Rev Dr Shut Khan Thang, Mission Secretary MBC

4. Rev Boipu Serto Mission Secretary CBCNEI

Ama ho hi apanguvin ahi.

Kuki Baptist convention Thalhengin, Pu S Athang Haokip Mission Board Chairman, Pu Neka Vaiphei Mission Board Member, Pu Haojakam DOUNGEL Mission Board Member, Rev Lamkeng Lhouvum, Mission Secretary chuleh GL. Amin Haokip, Development Staff cheng akipangin ahi. Pathen lungset in nom tah in kahung kimang chaovin ahi.

12. 03/03/2022] Bise Mile Missionary Quarter kisa Natoh Machal jing

Arunachal Tezu Mission Field Missionary Hemkhochon@ Chochon Haokip Arunachal Mission field a, Quarter um lou jeh a ama tah in Chen na ding Quarter asah chu Pathen lungset in ama chal jingin ahi. Hiche Quarter hi Pathen phatsah ahileh May lha lam leh katdoh na kinei ding ahitai. Pathen in jo thengna anei na din tao na in geldoh u hite.

Tu tua ngaichat hi 1. Wooden Door 2. Window 3. Gas Stove 4. Lupna 6. Kitchen items kong le bel, Chair Table ho ngaichat ahin, lam doh a aum na thei din tao peh jingu hite.

13. Nepal gam Missionary a dia Vaikon ding Gl. Tongminthang Kipgen .

Kipa umtah in Missionary dinga ana kipe doh Gl. Tongminthang chu tukum a pat 'a KBC Mission field a tong pan din aum thei tan Pathen thangvah in um hen. Ama hi Pathen phatsah ahileh Nepal Gam'a Missionary khat a dia vai kon ding ahitai. Tunin KBC office a Rev Dr, M, Thongkhosei Haokip General Secretary KBC in Tao peh na aneitan ahi. Achesa nisim 20th March 2022 nilhah Sunday nikho chun KBC Centree Church Salem Sapormeina Houbung miten kipa thilpeh leh vailhah na kin loupe tah chu ana neipeh taovin ahi.

14. Missionary Sponsored ding pumbe leh kipa thuphon.

Kipa umtah in Rev Paojangam Haokip leh Family, Pakai kum 2022 a pat'a KBC Individual Mission Sponsored a Lha khatna Rs. 1000/ a pang dingin kipeh na ahin nei Ihon tan ahi. Pathen insung phat thei boh jing hen lang vang boh jing ta hen. Ngailutna nei tah a Mission office jong ahung vil jallun kipa thu sang tah in kahin phongin ahi.



15. 19:10, 15/03/2022 EPM a main sanctuary Kanchi Kipanta.

EPM mun'a in kisa chu kanchi dopdoh dingin Evan Jamkho thang Haokip in Pathen henga taona amangin ahi. Muntinna um Houbung mite jousen jong Mistry ho kisuhkhah umlouva jo a aum nadin Pathen heng taonan geldoh ute. Kanchi hi Ft 96 sao ahin hahsa thou ding ahi. Hijeh chun hiche nikho hin gun chu tah in pangin Kanchi akhang doh taovin ahi.

16. 03/2022] MAIN SANCTUARY KISA MACHAL JING KIPA THUPHON

Pathen in Houbung mite taona asan jallin, Elijah Prayer Mountain mun'a Main sanctuary kisa chu ama chal jingin ahi. Mistry hi Bricks..leh Iron mistry hon atoh khom jing ahin, Pathen lungset in Tuni chun Kanchi ho tundoh in aumtan ahi. Houbung mite lah a kona jong kipehna Houbung leh Changval'a kipeh na nei aban ban in ahung umin kipa thi sang tah in kahin phongin ahi. Kitohkhahna ho um louva lolhing tah in kisa kichai thei nadin taona a gel doh jingu hite.

17. 18/03/2022 Indian Orphan Mission (IOM) ho chung a kipa thuphon.

kipa umtah in IOM a kon a ningkum a project ana kiboipi chu lolhing in aumtan, Molkon Bazar a Mission and Evangelism noi a ana ki bol Compassion Tuition Centre adin 15k Rupees worth Stationery items le Sports items donate eihin bol peh uvin ahi. Items hochu Notebook, sketchpen, pencil, eraser, football, volleyball, carrom, badminton, stand fan le adang dang ho ahin ahi. Thilkeu ijakai igalah peh uva pang Pr. Seikholen, Molkon Bazar C/C chung a kipathu sangtah akiphongin, ahin donate a IOM chung a jong kipana seijou-lou iphong uvin ahi. Hiche thilkeu hohi Tuition Centre chapang ho leh CWS a chapanghon aman ding ahin maban a IOM a kon a project dangdang kingaito hojong alolhin peh nadin taonan kop jingu hite. God bless IOM

18. 20/03/2022] REVIVAL PROGRAMME GURKHA NEPALI FIELD CHINGMEIRONG

Gurkha Nepal Mission Field Chingmeirong, Imphal muna achesa 17th-20th Match 2022 sunga Revival Programme ana che lhan ahi. Hiche nikho sunga hin Pastor Man Parshad leh Rev Jiteen Speaker in apang Ihonin chuleh Missionary Bijay chu Devotion Leader in apangin Pathen lungset in Camp chu lolhing tah in akichaitan ahi. Hiche Camp sunga hin None Christian ho leh Christian Gurkha Nepali community kigom khom ahin, alolhing lheh jengin ahi. Pathen chu thangvah in um hen.

19. Missionary Mangcha Haokip ji neita:

Pathen lungset in Missionary Mangcha Haokip Pastor incharge, Meitei Baptist Church Moreh chu Pathen thil gonin 16th March 2022 nikhon Ng. Tingcha Baite toh Houdan theng'a akichen Ihon tan ahi. Ama ni hi S. Saheibung Baptist Church KBC No.7 Mun'a Rev Lamkeng Lhouvum Secretary Mission & Evangelism KBC kin Thempu hina in Pakai jang gop chu ana chang Ihon tan ahi. Pathen in phat thei boh jing Ihon hen.



MEN DEPARTMENT (REPORT 2020-21)

Rev. Tongmang Haokip
Men Department Secretary

Men Column

Convention Men Department khantounale machalnaho achomlam taha report petheija kaumjeh in hatchung nung Pathen in kathangvah in chule Pakai lengpi leija toh khompi Houbung mitele muntinna Pate jouse kangailutnao pakai min in Salam kahin peouve.

(1) 41th MEN Department Annual Assembly :- Achesa Dt 9th-11th December 2021 41th channa Men Department Annual Assembly Moreh Baptist Church Gambih NO. 15 munna pathen mapuina jalin lolhing tah in Assembly anakiche lhan pathen thangvah in umjing taken.

Assembly sunga kiman chahnaho:-

Dt 9th December 2021 Lhun kim nilhalang niden 4.00PM in, Pu Seikhohao Vaiphei President Men Deptment in Assembly Pon lap khaidohna aneijin Rev. Thanglen Haokip Gambih Pastor in Pathen henga taona amangin Assembly thenso ahitai.

Nilhah houkhomna ah Pu Kaikholim Haolai V/President Men Depatment KBC lemnathu ase in ahi. 2021 kum sunga Pate hinkho llinga anachema-saho geldohnale jana akineijin, Rev. Thangkhomang Haokip Gambih NO.16 Pastor in adalhah insung miteho dingin, pathen henga taopehna anei in, chutuh kilhon in Khonei Pate in Pathen vahchoin na langaitah asaovin. Gambih Wise a min kouna a Gambih 1-21 chan ahung sohkeijin ahinla, Gambih NO.18 (Assam Karbi Anglong) Dimapur Bandh jeh in ahung theita pouvin ahi. 2021 kumsunga Permanent Missionary Fund (PMF) dangka 2000(sangni) apat chunglang peho Memento pehding kitichu mi 52 (somngaleni) Memento hopdohna jong anakineijin ahi.

Dt 10th December 2021 Jingkah Devotion:-

Jingkah Devotion in, Rev. Lamkhogin Haokip Pastor Gambih NO. 14 in Pathen thu ngaitah aseitoh kilhon in mipin taokhomna akineikhom in Assembly akipan kitai.

41th Assembly a kiphatsah ho gahhetthei dingho:-

- (i) 2022 kumsunga Pate Camp mun 4 (li) bolding.
- (ii) "Permanent " kitichu "Pate Missionary Fund" (PMF) joh a kikhel.
- (iii) 2022 sunga Pate jousen pathen natohna a atamthei penna Pate Missionary (PMF) pehsoh kei ding.
- (iv) Pate Missionary Fund chu tukum 2022 a patna Rs 500/ chung lam pehtah ding chule Rs 5000 (sangnga) apat chunglam peho Memento pehding.
- (v) Lom Resource Centre (LRC) muna theiphung/gophung tubeding



chule Gancha vahthei chan vahbe ding.

- (vi) 2022 Pate nikhole LRC DAY a Office langa konna Speaker solthei chan solding.
- (vii) 2022 kumsunga Houbung tina Pate Angolna taona khatve mansoh keiding Offering le Anngol naho Office lang thahsoh kei ding.
- (viii) 2023 42nd Annual Assembly munding Gambih NO.18 (Assam Karbi Anglong) amaho Gambih Conference toh kopding Pate jouse atam thei penna cheding.

Nilhah kaikhomna akinei kit in, Ng Lhingbem Baite in Pathen vahchoina la asah toh kilhonin Rev Tongmang Haokip Secretary Men Department KBC Pathen thu aseijin ahi. Pu Thongkholal Haokip Men Work Committee Member KBC kipathu asein in ahi. Kaikhom kichaijin Pu Kaikholim Haolai V/President in Assembly ponlap khailhahna aneitoh kilhon in Rev. Mangboi Kipgen in Pathen henga taona amangin Assembly akichaitai. Assembly Pathen lungsetna jalla lolhingtah a akichai toh kilhon in Assembly Member cheng le Moreh Baptist Church hotoh Advent Chirstmass ana kimangkhom in ahi.

Kipa thu seina:- 41st channa Men Department Annual Assembly lolhinna dinga pan hinlaho jouse chungu kipa thu ahung kiphonge , adeh in akhonei a Houbung miten jingkah nilhaha Anneh tuidon alhinglal jouse eipohdoh pehuva, phate cha eivettuppehuva, lupna touna ejakai phate cha eigontuppeh jehun achunguva kipa thu sangtah in ahung kiphonge , Pathen in Houbung phatthei boh jing taohen.

(2) Lom Resource Centre (LRC) :-

(i)Tule tun Lom Resource Centre muna natoh achelhajingin ahi. Kumni masanga Aieng monsom kitu chu tulai tah in akikhotin, abanle kolbu, Bal, Kol kai, adang 2 tuding in amun semtup dingin akigonge, theiphung Lichiphung, Komla, Apple phung, Motphung, Kolchu phung, Thingchangmai phung, adang dang kiphut hojong aphung suhtheng jing angaijinge, natoh ding atamin, mi akihole natongding ngaichat ahijinge.

(ii) Gancha kivahho :-

(a) Tule tuin in jong pathen lungsetna jalin Vatot akivah jing in phat chom khat joule johphat tah dingin jong kinepna aume.

(b) Tun Vohcha 7 sagi nakivah in abanna vahbe ding deina jalin phatea vahna thei dingin jong Chawkidarpa jong Basic Traninga akisol in damsel in Basic Traning jong ahinchai tan, chule Vohkul jong Japante methot (Bokashi) 10x50 len akisah ben pathen lungsetna jalin akijou tai. Vohnou jong 25 somnile nga akiorder in agenthei lamma lahdingin akigongin ahi. Muntina Patehon pakai lenggam natoh ehatbe cheh na dingun enatoh hohi alolhinna thei dingin taonatoh thoa pontho taha pan lajing dingin pakai min temna kahin neije. Pathen in Convention Men Department phatthei boh jing taken .

CHILDREN MINISTRY

Ms. Tingneihing Kipgen
Women Secretary

Women Column

Driver thah:

Mr Satkhogin Kipgen, Pu Mangkam chapa Songjang Baptist Church KBC No. 6 a kon ahin, December 1, 2021 a kon in Contract in KBC Women Department Gari tol in ahung pang pan tan ahi. Pathen in atohna a machal na pejing taken!

Children Department Director thah:

Mrs Pretty Lhingneilam Pastor Seikholen Kipgen inneipi hin Children Department Director pan mun hi 1st January 2022 nikho a pat in alo pan tan ahi. Ama leh a ministry Pathen in phatthei boh jing taken.

Lydia Resource Centre (LRC) a Ann Honding kihol:

Lydia Resource Centre a chapang ho an hon ding khat ngaichat ahin anojja deisah na nei ja lung lutna nei hon agangthei pen a apply bol thei ahi:

1. Nupi, Nungah or Meithai amun a umden thei ding deisah ahi.
2. KBC Houbung mi hiding
3. Mi 25 ding an phatah a hon thei hi ding
4. Contract a tong ding Salary Rs 5000/-

Children Worship Service Teachers' Orientation Org. by KBC, Women Department

KBC 69th Assembly phatsah na toh kilhon a Convention sunga Children Worship Service boldoh na theidingin Jilkungho Orientation chu February lhasung date 14 apat 23 chan cholnga louvin ana kinei in ahi. Hiche Orientation hi Gambih jouse hop a mun 11 a boldinga anakigong chu tuni chan in mun 10 a akiboldoh thei jin ahi. Hicheva ahung kalsuong hochu Houbung tin a Sunday School Superintendent, Chapanglang jilkung mi ni (alhompenna), Gambih Nute lamkai ho leh Centre Church Pastors le Gambih Pastor ho ahiuve. Host eibolpeh uva Houbung hochu C/C New Lambulane, C/C Urangpat, B/Ch Ekou Mulam, C/C Kangpokpi, B/Ch New Keithelmanbi, C/C B. Vengnom, C/C Sangaikot, B/Ch Khopijang, C/C Molnoi leh Moreh Baptist Church



ahiuve. Tomngai tahle ngailutna neitah in Houbung hon Host eibol peh utoh kilhon in refreshment tui tahtah jong eipoh doh peh uvin ahi. Hiche programme sunga hi CWS neilou akhohdan teho le CWS pat theidingdan teho Powerpoint le Paper Presentation kithon ahung kik-hom jilkungho le Houbung lamkai ho hilchetna kicheh tah in Mrs Pretty Lhingneilam, Director Children Department in anei jin ahi. Mipi a kon phatsah na thucheng le ahahsatna thucheng ho jong ana kingailhan ahi. Lolhingtah a Programme eichaisah u Pathen thangvah in um hen lang chuleh ahung jao jouse le mopo a pangjouse Pathen in phatthei boh taken.



Visual *Album*

(Kahin Lhaove)



(L). Rev. Dr. Hawlngam Haokip, Emiritus General Secretary KBC gel-doh jing nading le lainat pi na jalla Pu Lunpao Haokip, Music Chairman KBC in ana sem, KBC Central Choir in asah chu Nisim 08/02/2022 nin Rev. Dr. M.Thongkhosei Haokip in thenso na ana nei tan ahi, Hiche kingon na chun Jin-gun in Pu Alun Haolai, Former KBC President, Kin neipa in Pu Rev. Tonglet Haokip, KBC President, chule Jin ja um in Pu Rev. Ngamjapao Haokip, Former General Secretary KBC ana pang u vin ahi.

YOUTH DEPARTMENT

(REPORT - 2020-21)

*Rev. Lunkhosei Tuboi,
Secretary, Youth*

Youth Column

Bible Quest

thu a hetsah na

KBC Youth Department tohgon nanoija Bible Quest kibol jing chu tukum jong kibol jom kit ding ahin, hiti jeh chun mun tin na um houbung mite nule pa chule nungah gollhang koi hijong leu hen lunglut naneija Bible Quest a pang nom jousen kigot na ina nei cheh tah diu vin hetsah na kahin neiijn ahi. Chule April Iha a pat na BQ Form mu pan thei jong hung hidng ahitai. APang nom ajao nom jousen anoija kipe bang nga hi kigot na ina nei cheh tah diu vin hetsah na kahin neiijn ahi.

- a) Portion: Solchah (Acts), Rome, 1st & 2nd Corinthians leh Galatia hi pha akisan ahi.
- b) Form man le examination date:
Form man Rs 50/- hiding chuleh Exam nikho ding in 16th October (Sunday) hiding in pha akisai.
- c) Exam Timing: 10:30 am – 12:00 noon din pha akisai.
- d) Prize: Top 1 = Rs 15,000/- + Memento
Top 2 = Rs 10,000/- + Memento
Top 3 = Rs. 7,000/- + Memento
Top 4-10 Bible (leather cover) + Memento din pha akisai.
- e) Question pattern: Multiple choice question – 80 Marks, very short answer-10 marks, Fill up – 10 marks.





MUSIC COMMITTEE (REPORT - 2020-21)

*Rev. Lunkhosei Tuboi,
In charge Secretary*

Music Column

Staff Notation Khut-Choibu:

KBC Music Committee in phat sot tah ana kiboipi jing Staff-Notation Khut-Choibu chu sem chai ja aum toh kilhon in KBC sung'a Houbung khat in Houbung Copy khat cheh ina ki choh thei nadiu le iki koi tei tei diu deisah najallin Gambih Pastor ho jouse khut na ana kipe lut cheh tan hiti ahijeh chun KBC sung'a um kinsep pi umtah Houbung jousea Pakai lhacha hon ina khoh sah cheh uva bu khat cheh ina choh cheh diu vin tem na jong kahin nei in ahi. Aman hi Rs. 150/- bou she ahin July lhasung ngeija Office mun na nung peh cheh tei din jong kahin tem cheh uve.

Tonic Sol-fa Music Khutchoi:

Pathen in pha asah'a damna eipeh uleh Eiho Music Committee in ahin boipi jing Tonic Sol-fa Music Khutchoi Bu Intermediate class chan jong hung kisem chai'a mu thei ding'a hung umding ahitan, hijeh chun koi tobang hiche Khutchoi BU dei ahi louleh Houbung sung'a man ding'a dei i-um uleh Office lang'a Music Secretary leh Music Director pa kijahmat pi thei ding ahi.

KBC CENTRAL CHOIR A DIA KOUNA:

KBC Music Committee meeting Resolution no. 01/MC M-02/2022 Choir Member term lhing a um tah jeh'n athah term khat'a ding (2022 - 2025) chan lah be dia ki phatsah na dungjui in KBC Central Choir athah a kou kit tah din seilnah na akinei tan ahi.

Hiche to kilhon chun anoija angaicha cheng ho sese hi KBC Central Choir a pang nom jousen ahin peh lut cheh diu vin kou na ahung kinei tan ahi.

Choir Member ngaichat/ lahbe ding jat : Pasal 9 leh Numei 9, ag-om'a 18 hiding ahi.

Documents angai cha ho:

1. Seiphatna Lekha : Gambih/C/Church Pastor le Houbung Hetpehna Lekha. (Letter Head).
2. Bio-Data Lhingsel ding:
3. 2 Passport

4. Baptismal Certificate Xerox
5. Jilna /thepna sangpen inei Certificate Xerox
3. Music Thep na:
 1. Music lam le Tonic-Solfa Basic he mi hiding.
 2. Ham le pao lam'a English jong atho thei tei ngaiding
4. Testimony : (A4 type Page khat na ahin jih ding)
5. Experience : Church Choir leh Gambih Choir a pangsa dei na le ngaichat na asang jep me
6. Last date of Form Submission : April 21, 2022 (Tuesday)
7. Date of Interview : 25th April, 2022 (Monday) 10:30 Am to 4:00 Pm

Ipi ti Apply bol thei ding ham:

KBC Office mun na Choir Form na ki lah ding ahi
Hard Copy/Soft Copy hi jongleh muthei hiding ahi.

Contact:

Rev. Seiboi Tuboi Music Scretary KBC (8414919588)
Gl. Haoneo Baite, Music & Choir Director (9862539378)



Holistic Development Column

Development Column

Holistic Development, KBC le CASA kitho khom na noiya Covid-19 response programme Manipur sung district li (4) athah a project lut ding lut ding tohgon ahitoh Ihon in Kangpokpi, senapati, ukhrul le Kamjong district ho lhendoh ahitai.

Project pat ding ahitoh March 22, 2022 nikhon C/C Chassad mun a lhangsung CSO ho le Houbung lamkai ho jaonan CASA le KBC development in meeting organize akibol in natoh pat thei ding in aum gan ahi

Sd/-

Dr. Seilenkap Haokip,
Director





LITERATURE & PUBLICATION

Literature Column

Houbung mite henga hetsah na.

Ngailut um tah Pakai Lenggam a katox khompi ho, tunia na heng uva kahin hetsah na leh temna nom chu ahileh kum masa lai ja ana kimang jing, tulang a Houbung atamjon abol tah lou Sunday School Offering thudol leh Sunday School Hilchetbu a kon a Thudoh donbutna a lekha thot thudol a seinom kahin nei ahi.

Ajeh chu KBC Literature & Publication ding a Sunday School Offering hi Pathen na itoh khom naova pan ilah nao khat chu ahi.

Tuchan hin Centre Church hon amu jouse Office a ahin thah lut un amaho chung a Board min kipa thu kahin seije.

Amavang amun Houbung (Gambih) ho lah a Houbung phabep in ahin bol jing in, aboljing ho chung a kipa thu kahin seijin, amavang tuchan a bol lou ho leh abol jom talou hon athah a ahin gel khoh uva tukum a pat a pan ahin lah thah kit dingun Pakai min a hetsah na toh kilhon a temna kahin nei nahiue.

Chule tukum a Sunday School Hilchet bu a kon a Thudoh le Donbut na hi aman umlou(free) a hung kistem hi Houbung ahideh a lamkai hon thanop na ahin nei na ding uva hung kibol ahi. I-ham tia gelbang ahilou leh hung kibol jom lou maithei ahin, athon ahilou na ding a khohsah tah a hung kigong hi hetsah na kahin nei ahi.

Hiche thu hi tohkhompi Pastor hon jong Houbung a lekhabu ipeh phat uleh tilkhon na toh tho a iseipeh cheh na diuvn a vel in Pakai min in hetsah na kahin nei kit e.

Pathen in KBC phatthei eiboh jing taohen.

Keima Pakai lhacha,

(REV. T. THANGKHOSEI HAKIP)

Secretary, Literature & Publication Committee, KBC

SUNDAY SCHOOL TEACHERS TRAINING REPORT:

Sunday School Teachers Training hi KBC Centre B. Vengnom a Ni-

- sim 18-20 January 2022 sung in ana kibol in ahi.

Mihil ding in Rev. T. Thangkhosei Hakip, Secy leh Pr. Seikhogin

- Hakip, Lecturer STS (tua KBC Centre Church Molnoi Area Pastor) teni apang in ahi.

- Thupi seijin Rev. Thongkholun Touthang, Fin Secy leh Lit. & Pub. Secy teni apang in ahi.
- Anipi ni jingkah in Rev. Dr. Paotinthang Chongloi, KBC No. 8 Gambih Pastor apang in ahi.
- Hiche kin sunga Pathen vahchoila saho leh taona mangho, chule kin le dong a pang jouse chung a kipa thu ahung kisei kit e.
- Hiche Training sung hin tohkhompi Pakai lhacha phabep jong ahung pang theijin ama ho chung a kipa thu kahin seije.
- Hiche Training a hin deligate 100 leh lamkai cheng ahung pang in ahi.
- Hiche training sung Houbung miten ahung kikhom cheng anneh twidon, lupna touna kitup tah a eijen nao chung a Lit. & Pub. KBC leh ahung kikhom cheng in kipa thu seijou lou ahung kiseije
- Pathen in ikiloikhom nao phatthei boh jing taken.



SAJAL B/CH. DIAMOND JUBILEE



7th January 2021 (Friday) nikhon KBC no. 7 sunga um Sajal Baptist Church in akiphudoh kal kum 60 lhinna Diamond Jubilee lolhing tah in ana mang tauvin ahi.

Hiche kin a chun Gambih Pastor kinthempu in apang in chuleh Pr. Paogoumang Chongloi C/C Joujangtek Jubilee souvenir thenso in apang e. Rev. Tongmang Secy. Men Dept. KBC le Rev. Onkho Devt. Director KBC jong Convention Office thalheng in ahung kalsong lhon in Sajal houbung thilpeh jong anei lhon e.

Gamsung lamkai hole Haosa Upa jaonan mipi Hall dimset in Diamond Jubilee kinloupitah chu ana kimang in ahi. Pathen in Sajal houbung tule khonung in mapui jom taken.



KBC GENERAL ASSEMBLY 2022

REPORT

*Rev. Onkho Haokip
Development Director*

Report

Kuki Baptist Convention (KBC) chun achesa Tolbol (January) nisim 25-28, 2022 sung chun Manipur Kangpokpi District sung'a um Centre Church Salam Village, Sapormeina mun achun 69 lhinna General Assembly lolhing tah in ana mang chai tauvin ahi.

KBC sung'a lamchom chom'a mopohna chang lamkai tamtahho le Pensioner-ho jaona in Gambih 1-23 le houbung 306 akon thalheng lamkai agaom in mi 430 vel in pan analauvin ahi.

KBC sung'a Convention Executive Committee, Department umho, Committee umho, Board umho le Institution umho in 2021 kum sung'a anatoh danhou mipi angsung'ah tohphon hoitah in apeuvin ahi.

2021 kum sung'a tohphonho ngailhah ahitoh lhon in 2022 kum sung'a tohgon kineiho jong mipi angsung'ah luidohna ana umin mipin lungil tah in ana gelkhom uvin kilolna jong ana sem uvin ahi.

Hiche kilolna tamtah lah'a tahlang thei phabepho chu:

1. Revision of Pay Committee in phatah'a ahin sem Worker-ho le Pensioner-ho lhale semhoibena le sukhlangna ana um in ahi.
2. 2023 tengleh KBC in kum nga dan seh'a ahinbol khoppi lentah, Pentennial Fellowship chu bol dingin phatsah ahi.
3. 2022 kum sung'a Constitution Revision bol'a 2023 General Assembly tengleh mipi angsung'a luidoh ding ahitai.
4. Constitution dungjui le ngaichat ahi dungjuiyin Worker mi phabep Transfer/posting thah ana kibol in ahi.
5. KBC Worker khat in ama Earned Leave / Casual Leave mang cha'a Doctor of Ministry (D.Min) programme abol thei ding ahitai.

Assembly sung'a Worker phabep in Pakai le mipi angsung'ah kitepna (oath taking) analauvin ahi. Hiche chungchon chun Pakai lhacha mini jong Ordained ana kibol lhon in ahi.

Amani chu:

1. Rev. Thangtinlal Haokip, KBC Pastor
 2. Rev. Thangminlen Haokip, Asst. Pastor, Kuki Worship Service - Bangalore
- General Secretary kikhel kum ahitoh lhon in Assembly mipi ang sung'ah taona in Pathen dohna ana um in Rev. Dr. M. Thongkhosei Haokip chu 2022-2025 sung'a KBC General Secretary dinmun le mopohna ana chang tai. Mopohna alah ding toh lhon in Rev. Tonglet Haokip in taopehna le vang

thumpehna jong ana neiyin ahi. Het ding khat chu Rev. Dr. M. Thongkhosei Haokip ding'a tuchung hi General Secretary mopohna alahna phatbih (term) ni na hi ding ahi.

Assembly sung'ah nilhah seh in Pathen houkhomna ana um jingin, Rev. Tonglet Haokip, Rev. Dr. M. Thongkhosei Haokip, Rev. Lamkeng Lhouvum le Rev. Letlal Haokip speaker hina in "hung uvin kihoutoh uhite," (Isaiah 1:18) kiti thupi mang cha in kitilkhoulana um jingin ahi.

Assembly sung'ah jingkahseh in Rev. Thongkholun Touthang, Rev. Tongmang Haokip le Ms Lhingboi Kipgen makaina in Pathen heng'a taokhomna ana um jingin ahi.

2021 kum sung'a Hopsom le Maicham hinpeho ama houbung mi umdan toh kitoh'a asangpen 10 hi kipapina jong ana um in ahi. Pastor-ho lah'a anatohnaa agunchu le tohphatna neiho jong kipapina ana um in ahi. Hiche chungchon in Administrative Office a Office kai tampenho jong ana kipa-piuvun ahi.

Kaikhomna hoah KBC Central Choir, Centre Church Salem Village Sapor-meina Church Choir, Shalom Theological Seminary Choir le Gambih No. 4/23 Choir, KBC Nute Lamkaiho, Pu Peter Ngamsei Haokip le lasathem adangdangho akon in Pathen vahchoina la ngeitah tah ana kingailha in ahi.

2021 kum sung'a ana mollemsa ngaicheng geldohna le adalhah insung mite taopehna jong ana um in ahi.

Lekhabu thah ni jong ana kithenso in ahi.

Hiche teni chu:

1. Understanding KBC kiti (L) Rev. Dr. Hawlingam Haokip in anajih chu Rev. Tonglet, President in athenso in

2. Pastoral Ministry Guidelines kiti KBC Pastoral Committee in ahin semdoh chu Rev. Ngamjapao Haokip, Fomer General Secretary in ana thenso in ahi.

Centre Church Salem Village Sapor-meina (Host Church) Pastor-pa le atokhkompi Board of Deacon, COLA, Ushers chule mipite hapanna jal in mipi annehna, twi donna, gena, touna, kisilna twilum le ijakai kisuhtah le nomtah in ana chellha in ahi.

Ahideh in khangthahte in Assembly thalheng gari um jouse phatah'a ana soptheng peh uva chule polish jong ana bolpeh sohkeiyu chu aum kha behseh lou japi angsung'a thilpha kibol khat ahin melchih jing le lahson theitah chondan hoitah ahi.

Pathen in Kuki Baptist Convention hi nam sung le vannoiya hinna thu sal-vah jing dingin phatthei boh jom jing taken.



OFFICE DIARY

64th KBC Foundation Day

March 16, 2022 (Wednesday)

KBC hung kiphudoh kal kum 64 lhinna kin thupitah chu March 16, 2022 (Wednesday) nikhon KBC Administrative Office, Imphal munah lolhing tah in ana kimang chai tai.



Kington achun Rev Tonglet Haokip, President in Ponlap khaidohna aneiyn, Rev Dr. Thongkhosei Haokip, General secretary in lemna le tilkhouna thu aseiyin, Rev Seiboi Tuboi, Youth Secretary in ana mollemsaho geldohna phat le taona manna aneiyn, Ms Lhingboi Kipgen, Women Secretary in mipi taokhomna alamkaiyin, Pu Alun Haolai, Former president in KBC thusim le maban kalson ding dan thugil tah aseiyin, Church Choir Centre Church Canaan Veng, Imphal in vahchoila ngeitah anasauvin ahi.

Rev. Ngamjapao Haokip, former General Secretary le pensioner phabep jaona in KBC workers tamtah in pan analauvin ahi.

Hetthei khat chu KBC hi March 16, 1958 kuma Tujangvaichong khomuna ana kiphutdoh ahi



TAHSAN TWILUTNA

27/02/2022



Leisang Baptist Church, KBC
Gambih No. 6 mun a tahsan
thah numei 2 in Pastor Letmin-
lal Khongsai, Gambih Pastor
khuta tahsan twilutna ana
neilhontan ahi.

Pakai Lhacha,
Pastor Letminlal Khongsai,
Gambih Pastor

KIPA THUPHON

Pathen lungset in KBC Mission Board Tour 2022 a dia Amasa pen a din KBC Gambih No. 6, Centre Church Tujangvaichong area Houbung thum, 1. Centre Church Tujangvaichong a Pu Thangkholun Haokip le Pu Lenboi Singsit akimang chan ahi. 2. Songjang Baptist Church a Pu S Athang Haokip leh Pu Neka Vaiphei akimang chan ahi. Chuleh 3. Govajang Baptist Church mun'a Rev Lamkeng Lhouvum leh Pu Haojakam Doungeul akimang chan ahi.



Hiche Houbung vilna kinei sunga hin Akho akho a Haosa ho inn jong vilna jong aga nei u vin ahi. Achung chona KBC Mission Golkha Nepali Mission field Lamchock leh Anugrah Houbung teni jong vilna aga nei un ahi.

KBC No.8 & 9 Gambih te ni akon na Gambih thah semtoh na:

Achesa Nisim 16/02/2022 nikho nin CEC makai na noi jah KBC Gambih No.8 le 9 na kon na Gambih thah sem toh na chu KBC Centre Church Hill Town mun na ana kinei jin, Gambih No. 8 & 9 teni akon in lunggel le ngaito dan seikhom na akineiijin jou vin KBC Gambih No.24 le 25 chu sem toh na ana kinei tan ahi. Hiche nikho a neh ding don ding hin sem Host Church te chung'a jong kipa thu Pakai min in kahin phong doh u vin ahi.



GAMBIH THUSO LAHKHOM

GAMBIH No. 20 MEN DEPARTMENT AN NGOL TAOKHOMNA

Achesa nisim 12th Bulte (February) 2022 nikho ni Bongmol Baptist Church munna gambih Pate makaina noiya Nikhat an ngol taokhomna lolhing tah in ana chelha in ahi. Gambih Pastor Seiboi Haokip in "Nathum lou jehun nanei pouve" Jacob 4:2, ti thupi mangcha in ahung kikhom pate ho tilkhon na aneyin ahi. Chujouvin taona items ho chu aban ban chan Gambih Pastor makai na noiya achelha in ahi. Kingon te ho boina umlouva lolhinsah hatchung nung Pathen thangvah in umhen.

KBC No. 16 TWILUT NA ANA UM

Pathen jal in achesa Nisim 13/2/22, nin Molnom Baptist Church K.B.C. No. 16, a um khangthah chapang Numei mi gup, le Pasal mi Sagi agom ma mi somle thum in Pa Pathen Chapa Pathen chule chule Lhagao Theng Pathen min in Rev. T. Thangkhomang Haokip khut a Twilut na kin chu lolhing tah in ana nei tao vin ahi. Nilah kaikhom na a amaho Cheng Lahlut na le Certificate pehdoh na le Pakai an Jon Jong Houbung mipi toh akinei peh tao vin ahi. Pathen in Twilut thah ho tonsot in umpi jing ta hen, ama ho lah a Pasal khat le Numei khat hi Thingkangbung B/C, KBC No.16, a kon ahi lhon ne.

Nisim 26/2/22, nin Kuraopokpi Baptist Church, KBC. No.16 aum Pasal 1 le Numei 3 nilhum keijin pathen thu a til khon na le hil na aneijou Nisim 27/2/22, nin

TAHSAN TWILUTNA

13Th February, 2022

Govajang Baptist Church, KBC Gambih No. 6 mun'a tahsan thah mi 7 (sagi): numei 6 le pasal 1 in Pastor Letminlal Khongsai, Gambih Pastor khut'a Tahsan Twilutna ananei ta uve. Pathen Thangvah in um taken.

Pakai Lhacha,

Pastor Letminlal Khongsai, Gambih Pastor

GOLDEN JUBILEE

(1973-2022)

Govajang Baptist Church, KBC Gambih No. 6

12th February 2022, (Saturday) nikho in Govajang Houbung in Golden Jubilee ana mang uvin ahi. Hiche kin gon ah chun Pastor Letminlal Khongsai, Gambih Pastor in Jubilee Song hondohna aneyin Rev. Ch. Chungkholet (Retd. Pastor KBC) in Song Thensona aneyin ahi.

Chule Jubilee choir ho in Pathen vahchoi la Jubilee lapi ngaitah anasahdoh un ahi.

Hall program ah Pastor Letminlal Khongsai in Jubilee Thupi "Hinna Thu chu Domsang un" Phil.2:16a akon in tilkhouna aneyin, Rev. Chungkholet in Condolence Phat alan ahi.

Pathen jal in Jubilee lolhingtah in ana kimang chai theiyin, Pathen thangvah in um jing taken.

Pakai Lhacha,
Pastor Letminlal Khongsai, Gambih Pastor

GAMBIH REPORT

Pathen mapui na le ami lungset najal in achesa Nisim 15-19th Feb. 2022, sung in KBC No. 16, a um khanglai ten "Thoudoh in Salvah tan" kiti thupi mangchan Youth Gospel Olympic kum sung a tohgong a anei ju chu Rev. T.Thangkhomang Haokip Gambih pastor le Pastor Seikhogin Haokip pastor C/C Molnoi area speakers hi nale Anisiha chief Guest chom chom pan lah na in lolhing tah in olympic chu Senam BC mun a ana chelhan tai. Chutah kilhon in Nisim 23/2/22, nin the 12th. Gambih An ngol taokhom na a " Tu hijeng jongle na lungthim pumpi uvin kaheng a hung kile kitan" Joel 2:12, thupi mangchan Mi 200 chunglam ahung kikhop doh dung juijin taona items chi chom chom toh thon lungthim kisu nem pum in lolhing tah in an ngol taona chu Kuraopokpi BC mun a lolhingtah in ana che lha tai, Pathen in hiche kin tenia hung pang jouse le Gambih no.16, Houbung mite tonsot in phatthei boh jing ta hen. Kakipahe.

Pakai Lhacha
Rev. T.Thangkhomang Haokip pastor kbc no.16

KIPA THUPHON

Nisim. 10th-13th February, 2022 in KBC Centre Church B.Vengnom, Gambih No.8 a YOUTH CAMP akibol in "Keima ding in hin chu Christa ahin chule thi chu hamphatna ahi" (Phil 1:21) ti mangcha in Rev.Dr.Paul Paolen Haokip , NI.Hatpi Kipgen leh Rev.Lunzalen Church Pastor in Pathen thu hilna Campers 170 jaona in lolhing tah in ana chai tao vin ahi. Chuleh Campers hon Bible sim jing ding, Hou inn kai jing ding jong thulhuhna asem tauvin Pathen thangvah nale Choi-atna Chang taken. Amen!

JOUANGTEK KBC C/CHURCH

Pathen jallin KBC Centre Church Jouangtek Gambih No. 7 Houbung miten Pathen Houkhom nading'a Houin Thah sahding Plan and Project a ana nei nao chu tuni Nisim 15th Feb. 2022 nin natoh ana pan thei tao vin Pathen in lolhin na in mapui jing tao hen.



KIPA THUSEINA

KBC C/C New Lambulane Houbung toh gon na noiija Houbung in An-ngol taokhom na nei dia ana kiphat sah nao bang in Nisim 15th February 2022 nin EPM Gothol muna mi-150 vel in jinglam nidan 08:30 Cm. a konin nilhah lam 02: 40 Cn. chan Taokhomna lolhing tah in aga nei tao vin ahi. Hiche kin lolhin thei nading chun,

Pu Christopher Doungei IPS DGP in Bus-2 nin ahung pang in.

Pu T. Lalboi Haokip MPS CO/2nd IRB in Bus 1 Bus khat in ahung pang'in

Pu Mangpu Khongsai CO/1st IRB in jong Bus 1 in ahung pang in ahi chujong le Private Car le ama ama hi nathei cheh in jong Kalson na anei u vin ijakaija pan alah nao chung'a Pathen in phatthei boh cheh tao hen.

HOUNG THAH KILALUT

KUKI BAPTIST CONVENTION Gambih no.18 adingin SONGJANG houbung lalut hita. Achesa 13th March 2022 nikhon Gambih Pastor Letjakai Singisit



makainan GambihHoubung mite leh Lamkai chengin K.B.C kivaihomna noi-ya Gambih no. 18 sunga Houbungkhat'a pan lah thei ta dingin SONGJANG Houbung hi Lahlut na kin aki mangntan ahi. Amaho hi kho thah ahiuvn munt-nna um houbung miten taonan geldoh jingu hite. Pathenin K.B.C phatei boh jing henlang A leng gam na itoh hat thei nadiu vin Houbung eipun be-sah jing taohen.

TAHSAN TWILUT



Date 30/1/222 Nikhon Keithelmanbi Solam Baptist church KBC No. 5 akon Tahsan kibil phu Twilut na khang dong Pasal mi ni leh Nungah Mi 4 akon Gambih Pastor Thangminlal Haokip khut a Apa Pathen Chapa Pathen chu le Lhagao theng Pathen min Twilut na ana nei ta uvin ahi. Pathen in mapui jing u heng lang atahsan nau hatsah cheh jota hen. Kakipah e.

Pakai le mipi lhacha : Gambih Pastor KBC No. 5

GAMBIH ANNGOL TAOKHOMNA

4th November, 2021



Gambih No. 6 (Twilang Area) in kumsunga athumvei channa Gambih Anngol Taokhomna Kotlen Baptist Church mun'a Men Department mopohna noiya Taokhomna ana um in Pastor Letminlal Khongsai, Gambih Pastor Pathen thua houlimna anei in ahi. Taona lamkai in Rev. Mangboi Kipgen, Pastor Centre Church Tujangvaichong, Pu Seijathang, Gambih Chairman, Pu. Lhunkhohen, Tujangvaichong Inpipu, Pu Seilet, Kotlen Inpipi, Pi Nengneikim, Songjang Haosapi, chuleh Houbung Secretary ho apang uvin ahi. Gambih sunga houbung mi 145 vel in pan ala uvin ahi.



GAMBIH REPORT

Pathen mapui na le ami lungset najal in achesa Nisim 15-19th. Feb. 2022, sung in Kbc no. 16, a um khanglai ten "Thoudoh in Salvah tan" kiti thupi mangchan Youth Gospel Olympic kum sung a tohgon a anei ju chu Rev. T.Thangkhomang Haokip Gambih pastor le Pastor Seikhogin Haokip pastor C/C Molnoi area speakers hi nale Anisiha chief Guest chom chom pan lah na in lolhing



tah in olympic chu Sen-am BC mun a ana chelhan tai. Chutoh kilhon in Nisim 23/2/22, nin the 12 th. Gambih An ngol taokhom na a " Tu hijeng jongle na lungthim pumpi uvin kaheng a hung kile kitan" Joel



2:12, thupi mangchan Mi 200 chunglam ahung kikhop doh dung juijin taona items chi chom chom toh thon lungthim kisu nem pum in lolhing tah in an ngol taona chu Kuraopokpi BC mun a lolhingtah in ana che lha tai, Pathen in hiche kin tenia hung pang jouse le Gambih no.16, Houbung mite tonsot in phatthei boh jing ta hen. Kakipahe.

Pakai Lhacha

Rev. T.Thangkhomang Haokip pastor kbc no.16

Pastor Quarter Cum Office hondohna

Achesa Dt 18 /02/2022
Nikho in Gambih No 15
Pastor Quarter Cum Office chu Rev Thanglen Haokip Gambih Pastor in apa acha Chuleh Lhagao theng min in thenso na ana nei tan ahi .



5TH KBC GAMBIEH NO 3 YOUTH GOSPEL OLYMPIC 2022

Motto: Arise and shine

Theme: Teamwork makes the dream work.

Amun-Pangjang Baptist Church

Achesa nisim 1-5 February 2022 sung chun 5th KBC Gambieh no 3 Youth Gospel Olympic chu lolhing tahn ana kimang in ahi.

Kichep golseh kipat nadin Pa Thanglenlal Haokip Opening Ceremony Chief Guest in KBC Ponlap khaidoh na aneiin Gambieh Pastor Rev Henjalen in Pathen henga Taona amangin golseh chu anakipan in ahi. Gambieh Houbung 9 akon contingent lhingtah in ahung cheh un nilhah jingkah sehleh Rev Seiboi Tuboi KBC Youth Secretary le Rev Henjalen



Doungel Gambieh Pastor speaker hingan Pathen thuhinga khangdongte kiman khompina akineijingin ahi.

Golseh result (First hobou)

1. Football (boys) =Tengkonphai Youth Department
2. Football (girls)= Saijang Youth Department
3. Volley ball (boys)= Pangjang Youth Department
4. Volleyball (girl) = Tengkonphai Youth Department

Individual item tampi ajong kitetna akibolin Pathen puihoi na jallin kinah kibaona umlou hellin golseh ana chelhan ahi.

Phat khumkhanan Rev Henjalen Doungel Gambieh Pastor in Convention ponlap khailhah na aneiin golseh nomtah chu anakichai jin ahi.

Rev Henjalen Doungel

Gambieh Pastor, KBC no 3.





Kuki Christian lah a AMASAPENHO

- 1986 kum in Pantha houbung mun a KBC Men Fellowship masapen ana kibol e.
- 1977-83 sung in Pu S.N. Gangte (KBC) chun KBC/KCA-CEE-FU Secretary masapen a anapo e.
- 1992 kum in Rev. Yangthong Haokip in KBC natongho laha "Voluntary Pension" masapen ana kilah e.
- 1990 kum in Rev Seikholet Singson chu KBC Secretary-ho lah a amasapen in Pension anakisoltai.
- Miss Nemneikim Vaiphei chu KBC natong numei lah a B.D.M. Th. Ph. D. chai masapen ahi.
- 1997 kum a Rev Seikholet Singson in Ms Nemneikim Vaiphei Ordain ana bol chu KBC natong Numei Ordained kibol masapen ahi.
- 1981 kum Rev. Hawlngam Haokip KBC sung a amasapen in USA-Southern Baptist Theological Seminary a Doctor of Ministry (D.Min) ana chai in ahi.
- 1980 kum apat in KBC a "Self Reliance Scheme" ana kisem-doh e.
- KBC Office a Cashier post a appointment kibol masapen Mr. Onkhothang Haokip ahi.





Songjang Houbang aum Pasal 5 le Numei 4 chule Voneli Houbang akon numei 1 Gambih Pastor Letjkal Singot khut a Pa Parthen, Chapa Parthen chule Lhagao theng Parthen min in Teitlut na ana nei taovin ahi.



KBC Gambih 5 Leisang Baptist Church a Tohoan tulut na Pastor Letminkal Khongsai in e na bol in ahi.



Achesa Nisim 27/2/22, nin Kuraopekpi B/C KBC No.16 a Pasal 1 le Numei 3 twi lut na Gambih Pastor Rev. T.Thangkhimang Haokip khut a ana chang taovin ahi.

Post Regd. MNP/61
Regd. No. 18134/83



69th KBC General Assembly 2022 loithig tah in Center Church
Salem Village Saporneina mun a January 25 - 28 sung in ana
um in ahi.

*If undelivered, Please return to
The Editor, KBCTHUSO*
Kuli Baellet Convention
Cape DM College, Inchoh - 195001
Contact: 9883033173